



**PILEDIWA YA GO ITLHOPHELA MOATLHODIMOGOLO YO A TLA RWALANG MARAPO WA NAGA YA
REPHABOLIKI YA AFORIKA BORWA**

Matseno

1. Nako ya go nna mo tirong ga Moatlhodimogolo wa naga ya rona, e bong Moatlhodi Mogoeng Mogoeng, e leba bokhutlhong ka letsatsi la bo 11 Diphlane 2021.
2. Karolo ya bo 174(3) ya Molaotheo e neela Moporesitente maatla a go thapa Moatlhodimogolo yo a tla tsayang marapo morago ga gore Moporesitente a buisane le Khomišene ya Ditirelo tsa Boatlhodi mmogo le baeteledipele ba mekgatlho ya dipolotiki ba e leng karolo ya Kokoanotheomolao ya Bosetšhaba.
3. Go ya ka Molaotheo, Moatlhodimogolo ke *"tlhogo ya makala a boatlhodi mme ke maikarabelo a gagwe go tlhoma le go disa melao le maemo a a siameng a ka fao tiro ya boatlhodi mo dikgotlatshekelong tsothe e tshwanetsweng go diragadiwa ka teng"*.
4. Ke maikarabelo a Moatlhodimogolo go goga kwa pele dikgato tsa go tlhoma thulaganyo ya melao ya boatlhodi e e tshwanetsweng go latelwa jaaka e le ene yo a okameng ditsheko mo Kgotlatshekelong ya Molaotheo. Ke maikarabelo a gagwe gape go tlhoma le go disa dikgato tsa go tlhabolola maemo a go diragatsa tiro ya boatlhodi mo dikgotlatshekelong tsa naga ya rona, mmogo le go nna monnasetilo wa Khomišene ya Ditirelo tsa Boatlhodi.

Thulaganyo e e senang lehunelo e baagi ba nang le seabe mo go yona

5. Mo go rotloetseng dikgato tsa botlhokalehunela le go dira gore baagi le bona ba nne le seabe, Moporesitente Ramaphosa o tsere tshweetso ya gore maAforika Borwa a ke le ona a lalediwe go nna le seabe mo go itlhopheleng Moatlhodimogolo yo o tla tsayang marapo.
6. Ka jalo Moporesitente o laletsa baagi go itlhophela Moatlhodimogolo go tswa mo go bao ba dirileng dikopo. Re dumela gore Moatlhodimogolo e tshwanetse e nne motho yo a tlotliwang mo tirong ya gagwe mme e bile a tlotliwe le ke ditokololo tsa lephata la tiro e a tswang mo go yona le baagi ka bontsi mo setšhabeng.
7. Ditlhopho tseno di tshwanetse go felegediwa le ke dintlha tse di utlwagalang tse di tlhalosang mabaka a gore goreng motho yoo a tlhophilwe e le ene yo a ka tsayang marapo a go nna Moatlhodimogolo, maitemogelo a motho yoo a nang le ona mo go direng jaaka motlhankedi wa

tša melao, mmogo le maitemogelo ape fela a tiro ya gagwe jaaka moatlhodi le a go nna moeteledipele.

8. Mo godimo ga mabaka ano, ditlhopho tšeno di tšhwanetše gape di felegediwe le ke ditokomane tša go akgola kgotsa go ema nokeng motho yoo mme ditokomane tšeno di tšhwanetše go tšwa kwa go bonnye jwa mokgatlho o le mongwe wa batlhankedi ba tiro ya molao, go tšwa kwa mokgatlhong yo e seng wa puso yo tiro ya ona e leng go emelela batho mo mererong ya ditšhwanelo tša batho kgotsa go tšwa mo lephateng lengwe fela le le dirang ka tša molao.
9. Lenaneo la maina a batho ba ba tšhitšhingwang go ka rwala marapo le tla phasaladiwa.

Phanele ke yona e e tla tšhitšhinyang maina a batho ba e ka nnang bona ba ba ka rwalang marapo

10. Morago ga gore batho ba itlhophele bommamoratwa ba bona, phanele ya baitseanape ba ba nang le maitemogelo a a maleba e tla tšhitšhinya maina a batho ba ba dirileng dikopo ba le bararo kgotsa ba le batlhano. Phanele eno ke yona e e tla itšeelang tšhweetšo ya gore e tla diragatsa jang thulaganyo ya go kwala le go tšhitšhinya maina ka tsela e e senang lehunelo ntle le go goga maoto.
11. Mo phaneleng eno go tla bo go le moatlhodi yo mo malobeng a neng a direla Kgotlatshekelo ya Boditšhabatšhaba ya Phimolakeledi e bile gape e le Mokomišenara yo Mogolo wa Ditšhwanelo tša Batho mo Mokgatlhong wa Dinagakopano, Navi Pillay mme ene e tla bo e le monnasetulo mo phaneleng eno, Tona ya Ditirelo tša Bosiamisi le tša Kgopololo ya Batšhwariwa, Ronald Lamola, Tona ya Bosiamisi ya mo malobeng Jeff Radebe, Moatlhodimogolo wa mo malobeng Sandile Ngcobo, Mosireletsi wa Setšhaba wa mo malobeng Moatefokate Thuli Madonsela, Monnasetulommogo wa Lekgotla la Naga ya Aforika Borwa la AIDS, Mme Mmapaseka Steve Letsike, mmogo le Moporofesara wa Dirutwa tša Molao kwa Sekolong sa Dirutwa tša Molao sa Yunibesiti ya Howard, Moporofesara Ziyad Motala.
12. Moporesitente e tla nna ene yo a tsayang tšhweetšo ya gore ke maina a bo mang go tšwa mo lenaneong la maina a batho ba ba tšhitšhintšweng ke phanele eno ya baitseanape a a tla romelwang kwa Khomišeneng ya Ditirelo tša Boatlhodi mmogo le kwa baeteledipeleng ba mekgatlho ya dipolotiki ba e leng karolo ya Kokoanotheomolao ya Bosetšhaba gore le bona ba ntshe se se mo mafatlheng a bona ka maina ano.
13. Ditlhopho tsotlhe mmogo le ditokomane tsotlhe tše di tshegetsang ditlhopho tšeno di tšhwanetswe go romelwa ka imeile mo go angeline@presidency.gov.za le mo go cjnominations@gcis.gov.za pele kgwedi ya Diphlane 2021 e roga. Tšona di tšhwanetše go felegediwa ke:
 - 13.1. Lekwalo la go tlhopho mamoratwa, mmogo le dintlha tša go ikgolaganya le motho yo a rometseng tlhopho;
 - 13.2. Bopaki jwa go tšwa go motho yo a tlhophilweng jo bo pakang gore motho yoo o amogela tlhopho eno mmogo le dintlha tša go ikgolaganya le motho yo a tlhophilweng;
 - 13.3. Makwalo a go ema nokeng tlhopho eno, mmogo le dintlha tša go ikgolaganya le batho kgotsa ditheo tše di emang nokeng tlhopho eno, mmogo le bonnye jwa lekwalo le le lengwe go tšwa mo mokgatlhong wa batlhankedi ba tiro ya molao, go tšwa kwa mokgatlhong yo e

seng wa puso yo tiro ya ona e leng go emelela batho mo mererong ya ditshwanelo tsa batho kgotsa go tswa mo lephateng lengwe fela le le dirang ka tsa molao; mmogo le.

- 13.4. Tokomane nngwe le nngwe fela e motho yo a tlhophang mamoratwa wa gagwe a naganang gore e botlhokwa thata mo go emeng nokeng tlhopho ya motho yo a mo tlhophang go nna Moatlhodimogolo.
14. Ditlhopho tsotlhe mmogo le ditokomane tsotlhe tse di felegetsang ditlhopho tseno di tla phasaladiwa mo webesaeteng ya Kantoro ya Moporesitente go simolola ka letsatsi la bo 04 Diphilane 2021 (mme tshedimosetso eno e ka se tsenyeletse ya dintlha tse di botlhokwa tse di amang matshelo a batho ba ba tlhophilweng).
15. Dingongorego tsotlhe tse di ka nnang teng mabapi le batho ba ba tlhophilweng di tla tshwanelwa ke go felegediwa ke mabaka a a utlwagalang mme a kwadiwe le go romelwa ka imeile mo diatereseng tsa diimeile tse di nopotsweng kwa godimo pele ga Labotlhano wa letsatsi la bo 15 Diphilane 2021.
16. Phanele eno e tla tshwanelwa ke go garela tiro ya yona le go begela Moporesitente ka Labotlhano wa letsatsi la bo 29 Diphilane 2021. Moporesitente e tla nna ene yo a isang pegelo eno kwa Khomišeneng ya Ditirelo tsa Boatlhodi mmogo le kwa baeteledipeleng ba mekgatlho ya dipolotiki ba e leng karolo ya Kokoanotheomolao ya Bosetšhaba gore le bona ba ntshe se se mo mafatlheng a bona ka yona.